

D/Dna _____ con Documento de Identidade nº _____, con enderezo a efectos de notificación na Rúa/Praza _____, CP _____ da localidade de _____, en nome propio e diante da apertura do prazo de exposición pública por parte de Portos de Galicia do “**Plano Director das Instalacións Náutico- Deportivas**” (PDIND), DOG nº 87 de 7 de maio de 2008 e a efectos de exercer o dereito de presentación de ALEGACIONES diante deste organismo, a respecto da actuación 3.21 prevista como ampliación do Clube Náutico de Ribeira,

EXPÓN:

1.- O PDIND incumpre gravemente o art. 45 da Constitución Española que establece que:

Todos temos o dereito a gozar dun medio ambiente adecuado... así como o deber de conservalo e

*Os poderes públicos velarán pola **utilización racional de todos os recursos naturais**, ...*

De feito, esta actuación supón unha privatización do uso dun espazo que na actualidade está sendo libremente utilizado pola cidadanía de Ribeira en xeral para paseo, baño, lecer ou deporte.

A mesma Constitución Española establece que (Art. 132.2)

*“Son **bens de dominio público** estatal os que determine a lei e, en todo caso, a zona marítimo- terrestre, as praias, o mar territorial e os recursos naturais da zona económica e a plataforma continental.”*

Esta actuación detrae do dominio público unha ampla zona do litoral de Ribeira que, como consecuencia, pasará a mans privadas ademais de destruír de xeito irreversible os recursos económicos que este espazo xera na poboación local.

2.- O PDIND contravén a vixente Lei 22/1998 de Costas, no seu art.2 que establece que a Administración deberá:

- Determinar o dominio público marítimo-terrestre e asegurar o seu integridade e conservación, adoptando as medidas de protección e restauración necesarias.

- Garantir o uso público do mar, da súa ribeira e do resto do dominio público marítimo-terrestre, sen máis excepcións que o interese público...

- Regular a utilización racional destes bens... acorde coa súa natureza e co respecto á paisaxe, ao medio ambiente e ao patrimonio histórico.

Resulta evidente **que a actuación 3.21 do Plano, non garante a integridade do dominio público** xa que elimina un treito da praia de Coroso- As Carolinas. A actuación prevista provocará, como o propio Plan reconece, afectación na praia de Coroso por modificacións das correntes mariñas e nos fluxos de sedimentos con efectos claramente negativos tanto para a paisaxe como para a ecoloxía da zona. O propio Informe de Sustentabilidade Ambiental (ISA) que acompaña o Plano reconece moitas destas afectacións; no caso de Ribeira:

“...impactos significativos tanto nas zonas de extracción como nas de vertedura ao eliminar hábitat e especies bentónicas por enterramento” (pax.79 do ISA).

“As afeccións á dinámica litoral refírense especialmente ao desprazamento de praias próximas ás obras..., ou á erosión das mesmas.” (pax.79 do ISA)

“A construción de novas infraestruturas pode ocupar bancos de marisqueo que actualmente estan sendo explotados.” (pax.79 do ISA).

3.- O PDIND é contrario ao interese público xeral da poboación de Ribeira:

A actuación 3.21 non está minimamente xustificada en base a ningunha razón de “interese público” nin Galega nin moito menos local. O Plan basea a súa “necesidade” en enquisas realizadas no mundo da náutica en Salóns de París, Barcelona, etc. Para nada se ten en conta á poboación de Ribeira que debера ser fundamental á hora de valorar esta actuación xa que son **TODOS E CADA UN DOS CIDADÁNS E CIDADÁS DE RIBEIRA** os que van soportar o seu evidente impacto; son os que disfrutan, todo o ano, dun paseo marítimo e praia de 400 m. Serán eles e elas quen teñan que pagar por un servizo que ate hoxe disfrutaban libremente, quen perdan tan importante patrimonio e quen vexan conculcados os seus dereitos.

A poboación dedicada a labores de pesca e marisqueo ten manifestado a súa oposición á actuación prevista por destruír “un banco marisqueiro de grande produción de ameixa, navalla... e un banco natural de ostra autóctona dos poucos que quedan nas nosas costas”. A mesma asociación de mariscadores se amosa preocupada pola **destrución de postos de traballo directos**, de calidade e non suxeitos a estacionalidade (contrariamente ás actividades que o PDIND promove) que dan sustento **a máis de 250 familias** e teñen ademais unha gran influencia na economía local e no noso **xeito de vida tradicional**. Son tamén excelentes indicadores da calidade do noso medio ambiente e dos produtos locais. O PDIND non recolle os ingresos económicos xerados polo banco de Coroso, de incerto futuro de ir adiante a actuación 3.21 prevista en Ribeira.

Hai que ter en conta que desde o propio Club Náutico de Ribeira se ten manifestado interese exclusivamente en aumentar o número de amarres nunhas decenas ademais de mellorar o abrigo de ventos e correntes do nordeste, por exemplo, mediante un pantalán flotante. Estas demandas son coñecidas polas autoridades de Portos de Galiza e confirman a **escasa necesidade da actuación 3.21** prevista neste Plan para Ribeira.

Por todo o exposto,

SOLICITA

Que se retire do Plan Director de Infraestruturas Náutico – Deportivas a actuación 3.21 referente á ampliación do Clube Náutico de Ribeira substituíndoa, en todo caso, por unha actuación máis racional, sustentable e acordada con todos os sectores sociais afectados.

Ribeira a ____ de xullo de 2008

Asdo: _____

PRESIDENTE DO ENTE PÚBLICO PORTOS DE GALICIA. CONSELLERÍA DE POLÍTICA TERRITORIAL DA XUNTA DE GALICIA